

8 April 2006

Petikan dari Utusan Malaysia

MBAM mahu sistem penyampaian ditingkatkan

KUALA LUMPUR 7 April - Persatuan Pemborong Binaan Malaysia (MBAM) menyeru kerajaan supaya mempertingkatkan sistem penyampaian dan memperuntukkan kontrak-kontrak secara telus melalui tender-tender terbuka.

Mengulas mengenai Rancangan Malaysia Kesembilan (RMK-9), persatuan itu turut menggesa kementerian-kementerian berkaitan supaya mempercepatkan pengumuman mengenai tender-tender dicadangkan supaya para kontraktor boleh membuat bidaan segera.

``Sehubungan dengan ini, MBAM berharap Borang Seragam Syarat-syarat Kontrak dari Lembaga Pembangunan Industri Pembinaan (CIDB) akan digunakan untuk memperoleh harga terbaik dan paling kompetitif bagi kerajaan," katanya dalam satu kenyataan di sini hari ini.

Persatuan itu juga meminta kerajaan supaya mempercepatkan pembayaran kemajuan kepada pembina-pembina untuk melegakan kedudukan aliran tunai mereka yang ketat.

MBAM turut mengucapkan terima kasih kepada Menteri Kerja Raya, Datuk Seri S. Samy Vellu kerana mengambil kira sambutan awal persatuan kepada RMK-9.

Menteri itu sebelum ini menyatakan bahawa kementerian beliau akan menimbang cadangan MBAM untuk peruntukan kepada industri pembinaan supaya dipecah-pecahkan kepada kontrak-kontrak lebih kecil supaya kumpulan kontraktor dan kontraktor kecil yang berdaftar dengan CIDB boleh mendapat faedah.

``Memberikan kontrak-kontrak itu sekarang akan membantu menyediakan pembangunan sosioekonomi yang penting," kata MBAM.

Ia menambah, dana yang memasuki sektor pembinaan akan membolehkan sektor itu memainkan peranan sebagai pengganda ekonomi dalam merangsang perbelanjaan penggunaan domestik, mengekalkan pengambilan tenaga kerja pembinaan dan penggunaan besar bagi kelengkapan serta bahan-bahan yang dikeluarkan di negara ini.

MBAM turut menyokong penubuhan Badan Tindakan Pelaksanaan Nasional untuk mengawasi pelaksanaan hari ke hari projek-projek dan program-program di bawah RMK-9.

``Ini pastinya akan memupuk keyakinan rakyat bahawa kerajaan mempunyai komitmen yang kukuh untuk melaksanakannya," katanya.

Persatuan itu berkata, dengan peruntukan baru kepada industri pembinaan di bawah RMK-9, pembekal-pembekal dan pengeluar-pengeluar tidak akan mengambil kesempatan daripada keadaan dengan meningkatkan harga produk-produk dan perkhidmatan mereka.